

## IKAk 'Milaka argi Nafarroan' kanpaina jarri du abian

IKAREN KANPAINA duela egun batzuk hasi da eta 2013ko Aste Santuan bukatuko da. Bi helburu ditu kanpainak: batetik, Nafarroako euskaldunen sarea zabala dela adieraztea, eta bestetik, Iruñerriko IKAREN euskaltegiak diruz laguntzea.

IKAk Araban eta Nafarroan helduen euskalduntze eta alfabetatzean 40 urtetik gora daramatza eta euskaltegien sarea kezkatuta dago Nafarroan euskarak duen egoera dela-eta. Arduradunek diotenez, irakaskuntza arautuan eta helduen euskalduntzean aspaldian ikasle kopurua ez da handitu nahi beste. Gorakada nekezaren arrazoitzat asko dituzte: hel-

duak euskara ikasteko laguntzarik ez izatea; euskarazko haur eskolarik ez egotea; euskarazko komunikabideek erraztasunik ez izatea eta administrazioak berak euskarazko komunikabiderik ez izatea; lanpostu ia guztietan euskarak hutsaren hurrengo balio izatea...

Webgunea ([www.milaka-argi.com](http://www.milaka-argi.com)) jarri dute abian kanpaina bideratzeko. IKAREN euskaltegiak diruz lagundu nahi dituenak hortxe dauka aukera bere diru ekarpena egiteko. Bide batez, nafarra bada laguntzen duena, mapan argi bat piztuko da dagokion herrian. Horrela, Nafarroako euskaldunek osatzen duten sarea ere ikusi ahal izango da.

## Gazteen arteko mahai-inguruak euskararen inguruko kontzientzia pizteko

GAZTELUZOK, Gipuzkoako Foru Aldundiak eta Euskal Herriko Unibertsitateak antolatu dute abenduaren 3rako *Ika Mizka* ekimena. Helburua gazteen artean euskararen erabilera bultzatzea eta hizkuntzaren inguruko kontzientzia sortzea da. Abenduaren 3rako, Euskararen Nazioarteko Egunerako,

gazteek izena eman ahal izango dute euskaldun ezagunekin mahai-inguruetan parte hartzeko. Asmoa da euskara erabiltzerakoan sortzen zaizkien egoerak, sentimenduak eta abarrak elkarbanatzea. Azaroan, *Gaztezulok* tankera horretako mahai-inguruak zintzilikatu ditu sarean ([gaztezero.com/ikamizka.php](http://gaztezero.com/ikamizka.php)).

## Bahea

Mikel Irizarrek *piperhautsa* blogean *Soinujolearen semea antzezlana* ikusita egindako gogoeta:

"Tanttaka taldearen taularitze ederraren gainetik nagusitu zitzaidan hizkuntzarekiko harridura. Ze antzezpeanean gaztelaniaz mintzo dira amerikanoak, guardia zibilak eta fatxak, eta baita haiekin ari diren euskal hiztunak ere. Zer dela eta? Zergatik sartu gaztelania barra-barra euskal liburu baten euskal bertsoan? Ez al da euskara hizkuntza konpletua, edozein egoera dramatiko adierazteko beste? Derrigorrez behar al du gaztelaniaren makulua grazioso edo adierazkor izateko?"

Akatsa ez dago hizkuntzan, baizik hiztunengan. Hiztun desorekatuek ez dute sinisten bizitzaren edozein zirkulu osorik euskaraz egin daitekeenik. Ez diote euskarari nahikotasunik aitortzen."

## EKONOMIAREN TALAIAN • TERMOMETROA

### Kapitalismoaren esklaboak

KAPITALISMOAREN AURPEGIA krudeltasun osoz ari da azaltzen iritzi publikoaren aurrean. Kapitalismo basatiak aldizka suizidioak eragiten ditu, eta langileak hiltzen ditu euren lantegietan. Kapitalismo hori, ordea, basakeria itzelez agertu zaigu etxetik kanporatuetan. Amaia Egaña da, oraingoz, azkeneko hildakoa Euskal Herrian. Kapitalismo horrek izenak ditu: enpresa handiak, bankuak eta kudeatzaile politiko eta judizialak.

Banku horiek dira, hain zuzen, "lobby" baten gisan aritu direnak Espainiako Ministroen Kontseiluko mahai azpian, eragozteko euren kontrako neurririk har dezaten etxetik kanporatuen auzian. Bankuak ez dira argazkian azaldu. Baina eurek zehaztu dituzte erabakiak. Hala, Espainiako Gobernuak ez du 1909ko Hipoteken Lege zaharra ukitu nahi izan, bankuen presioaren ondorioz. Lege hori lurjabe handiekin eta bankariekin zituzten harremanak arautzeko sortu zen. Justiziako sektore batzuen arabera, "prozesu judizial oso oldarkorra da

zordunarekiko, hipoteka maileguaren eskriturari sententzia judizial bati baino eraginkortasun handiagoa onartzen dio, eta zorduna oso aukera gutxiarekin uzten du kontra egiteko". Horregatik, Gobernuak, legea aldatu beharrean, dekretua agindu du, etxetik kanporatzeen zati txiki bat bi urtez geraraziz... Eta gero zer? Etxetik kanporatuei "Banku txarraren" jabetzako etxebizitza parkea eskaini diete alokairu sozialean. Hemen ere bistan da bankuen presioa. Dirua irabazten segituko dute etxetik kanporatuen alokairuaren kontura.

Legea ez aldatzearen, Gobernuak zertxobait "mugitu" da suizidioen eta mobilizazio sozialaren aurrean. Bankuen eta Troikaren (Nazioarteko Moneta Funtsa, Europako Banku Zentrala, Europako Kontseilua) esklabo direnez, hildako gehiago beharko al dituzte, pixka bat gehiago "mugitzeko"? Halakoxea da kapitalismoa: krudela eta hiltzailea.

Juan Mari Arregi

